

En memoria da:

## Sigisbert Cavegn-Krucker, Sedrun/Basilea

Scriver in necrolog per in bien amitg ei in duer ed in Dieus paghi per l'amicabladad gudida. Empriu d'enconuscher Sigisbert Cavegn hai jeu a Basilea enten dar troccas. In um spir curtesia ed adina dalla buora! Contas emperneivlas uras vein nus passentau ensemen en sia uustria ni cun la Societad grischuna.

### Sia affonza

Sigisbert Cavegn ei naschius si Sedrun ils 10 d'october 1930 – la sera allas sis. Demai ch'igl ufficial civil aveva gia serrau il spurtegl, ei Sigisbert vegnius registraus per il di sissu, e consequentamein era adina festivau siu anniversari ils 11 e buca ils 10 dil meins d'october. Sco secund affon da Stiafen e Castgina Cavegn-Berther eis el carschius si cun aunc otg fargliuns el ravugl d'ina famiglia purila, nua ch'el sesenteva protegus. Mo era ad el ha ei tucchau da far caver e dad ir ad alp. Co tarlischavan ses eglis cu el raquintava da sia veta da pastur. Da gliez temps eran las stads aunc liungas per la buobanaglia ed il temps da scola cuorts.


### Sigisbert banduna la Val Tujetsch

Igl onn 1948 ha Sigisbert bandunau Sedrun ed ius a Basilea per far igl emprendissadi da laborant tier la firma Hoffmann-La Roche. La sera frequentava el aunc la scola «Benedikt» per seperfectziunar el lungatg tudestg ed els roms mercantils. Beinsavens seseva el lu el Café Basilisk e fageva ses pensums, ensemen culla feglia digl ustier. Ed els han fatg buna pasta e giu nozzas ils 29 da schaner 1957. Il Segner ha schenghegiu ad els siat affons: tschun mattatschas e dus buobs, lur pli gronds scazis. Naturalmein ha Sigisbert era mussau a ses affons d'apprerziar sia cara patria tuatschina. Igl onn 1980 ha el schizun schau ereger ina casa da vacanzas a Sedrun. El mava savens culs ses ensi. E lu fageva el di per di ina viseta a sia cara mumma.

### Sia professiun

Ord raschuns da sanadad ha Sigisbert stuiv midar anno 1957 sia professiun ed ei entrasu ella gronda firma da baghegiar Stamm. Cun sia diligenza, curtesia ed amicabladad eis el dabot s'avanzaus a procurist e schef dil personal.

Avon 11 onns ha Sigisbert lu surpriu il hotel Basilisk. Cun sia gentilezia ed



amicabladad fava el l'olma dil menaschi da famiglia, nua che sia sira, siu sir, sia consorta e ses affons stevan buca culs mauns a calun.

Sper tut siu far e demanar predeva el peda per ils ses, mava a spass cun ses affons, ni fageva in sparun si el Grischun – e tut quei senza negligir sia clientella. El veva peda pils auters.

Dapi 1976 eis el staus commember dalla «Basler Liedertafel», duront 8 onns sco cassier. Gie, el cantava bugen, steva bugen en cumpignia ed era beinvesius dapertut, era ella Societad grischuna a Basilea.

### Sigisbert vegn malsauns

Igl onn vargau ha quella veta, quei viver plein sulegl, entschiet a sguardinar. Ina maligna malsogna ei dada a sies ad el. El sedosta, supporta curaschusamein siu destin, lai dar orasut nuot, selamenta mai e sesuttametta alla veglia dil Tutpussent.

Ils 26 da december 1989, da sogn Stiafen, ha Niessegner priu Sigisbert tier El. A sia cumbrigiada consorta Margot, a ses cars affons, a sia buna mumma, a ses fargliuns sco era a sia sira ed a siu sir miu sincer cordoli. A Ti, car amitg Sigisbert, giavischel jeu da tut cor la legria perpetna e ditgel: «A bien seveser».

Tiu attaschau amitg  
Gion Tumasch